



REPUBLIC OF RWANDA/REPUBULIKA Y'U RWANDA

National Commission for the Fight against Genocide

Commission Nationale de Lutte contre le Génocide

Komisiyo y'Igihugu yo Kurwanya Jenocide

-CNLG-



TARIKI YA 03 GICURASI 1994: UKO JENOSIDE YAKOREWE ABATUTSI YAKOZWE

Ku munsu nk'uyu w'itariki ya 03 Gicurasi 1994, Leta y'abicanyi yari ikomeje umugambi wayo mubisha wo gutsemba Abatutsi mu duce tumwe tw'Igihugu. Iyi nyandiko iragaragaza hamwe mu hantu hiciwe Abatutsi tariki ya 03 Gicurasi 1994.

1. Abatutsi biciwe kuri ADEPR ya Gihundwe, Rusizi

ADEPR Gihundwe yubatse mu Karere ka Rusizi mu Murenge wa Gihundwe, akaba ari naho hatangiriye Itorero ADEPR mu Rwanda. Muri mata 1994, mu rusengero rwa ADEPR Gihundwe no muri Groupe Scolaire Gihundwe bahungiyeye Abatutsi bari baturutse mu zahoze ari Komine Kamembe na Cyimbogo ahitwa Nyakanyinya, Mutimasi, Murangi, Ruganda.

Abatutsi batangiye guhungira Gihundwe kuwa 14/04/1994 nyuma ya saa sita nka 15h, ariko ubuyobozi bw'Itorero bwari bwabanje kwanga ko Abatutsi binjira mu kigo, ariko butangiye kwira baje kubareka barinjira. Bukeye bwaho Interahamwe zarinjiye zicamo Umututsi umwe ziragenda. Perefe BAGAMBIKI Emmanuel wa Cyangugu, amaze kumenya ko Abatutsi bahungiyeye muri ADEPR Gihundwe no muri Groupe Scolaire Gihundwe yaje kubatwara abajyana muri sitade Kamarampaka ababeshya ko ariho bazacungirwa umutekano. Ntabwo bahise babyemera kuko bari bazi ubugome bwe.

kuwa 03/05/1994 nka 10h nibwo Abanyeshuri 3 bigaga i Gihundwe bakomokaga mu Ruhengeri na Byumba bari barimuwe n'imirwano yaberaga aho bakomokaga, imiryango yabo ika yari yarazanywe Nyacyonga nk'impunzi, bakaba bari bayobowe n'umunyeshuri mugenzi wabo wirirwaga akora Jenocide hirya no hino muri Rusizi, bagiye guhuruza Abasirikare.



Haje abajendarume 3 begeranyiriza Abatutsi bari bahungiye mu kigo, babahuziza mu gikoni cy'Abanyeshuri barabarasa, banabateramo gerenade.

Abayoboye ubwicanyi bwabereye i Gihundwe bari bagizwe na: Prefet Bagambiki Emmanuel, Sous-prefet Theodore Munyangabe na Francois Nzeyimana, Lieutenant Samuel Imanishimwe wayoboraga abasilikare muri Cyangugu, Major Vincent Munyarugerero wayoboraga jandarumori muri Cyangugu, Christophe Nyandwi wari umukuru w'Interahamwe, Elysee Bisengimana wigishaga muri Groupe Scolaire i Gihundwe (yakatiwe na Gacaca igifungo cy'imyaka 19), Pastori Nsanzurwimo Joseph n'umuhungu we Nsanzurwimo Jean, Pastori Remesha Simeon (yarapfuye), Ruhire Murwanashyaka, Bareberaho Bantari Ripa, Pastori Seromba, Simeon Nshamihigo wari subusititi kuri parike ya Cyangugu, akaba yarakatiwe igifungo cya burundu na TPIR, Sgt major Ruberanziza Marc, Tomson Mubiligi, Ndorimana Paul wari Prokireri wa Repuburika i Cyangugu, n'abandi.

2. Abatutsi biciwe ku Ibambiro, Nyanza

Ku i Bambiro ni mu yahoze ari Komine Muyira, Segiteri Matara, Serire Rugunga; ubu ni mu Karere ka Nyanza, Umurenge wa Kibilizi, Akagali ka Cyeru mu Mudugudu wa Rutete. Kuva Jenoside yakorewe Abatutsi itangiye mu Gihugu ku itariki ya 07/04/1994 ntabwo yahise ihagera bafashe igihe cyo kuyicengeza no gushishikariza abaturage kubyumva ndetse no kuyikora.

Mu gace k'Amayaga, by'umwihariko mu Murenge wa Kibirizi, Jenoside yakorewe Abatutsi yatangiye gukorwa mu matariki ya 19/04/1994 nyuma ya discours ya Sindikubwabo yakoreye i Butare avuga ko abantu bigize ba ntibindeba.

Abatutsi batangiye guhigwa bukwere, kwicwa, gutwikirwa, gusenyerwa no kunyagwa ibyabo. Ubwo bahise batangira gukwira imishwari, gutatana, kwihisha no guhunga kuko bari batureranywe n'abaturanyi. Guhiga bukwere Abatutsi byarakomeje ariko bigeze hagati abicanyi bayobya uburari batanga amatangazo ko hatanzwe ihumire ko abagore n'abana cyane cyane ab'abakobwa batagomba kwicwa ko bazabarindira ku i Bambiro.



Ibyo byatumye abari bafite aho bihishe basohoka maze bose bajya ku i Bambiro ndetse bamwe bambika abana bato b'abahungu udukanzu tw'abakobwa kugira ngo biyoberanye.

Kubera ko bagiye ku i Bambiro bazi neza ko bagiye kuharindirwa umutekano byageze ku itariki ya 01/05/1994 hari umubare w'abagore n'abana basaga 454 bahahuriye. Muri icyo minsi y'ubuzima bwo ku i Bambiro, abicanyi barazaga bakarobamo abo bashaka bakajya kubica abandi bakajya kubakorera iyica rubozo bakorerwa ihohoterwa rishingiye kugitsina (kubagira abagore babo ku gahato). Abicanyi bamaze kubona ko umugambi wabo wagezweho w'uko abagore n'abana bahuriywe ku i Bambiro bacuze umugambi wo kuza kuhabicira ku itariki ya 03/05/1994.

Ku itariki ya 3/5/1994, abicanyi baje bafite intwari gakondo z'ubwoko bwose, bambaye amakoma bavuze amafirimbi bagota ku i Bambiro hose batangira kwica. Babanje gucuza ababyeyi, babambika ubusa, kubafata ku gahato, kubabwira amagambo mabi (ubwirasi bwanyu, agasuzuguro kanyu, ubwibone, ...) barangiza gukora ibyo bakora bakabatema bakabajugunya mu musarane bamwe na bamwe batarahwana. No kubica byakorwaga mu byiciro bijyanye n'imyaka habanjemo abana, hakurikiraho abakobwa b'abangavu, abakobwa bigiye hejuru, hakurikizwaho abagore b'amajigira n'abakuze.

Ibyo barabikoze biba umuganda w'umunsi wose ariko mbere yo gutangira kubica babanje bica umusaza Diyonizi Nzaramba yari umusaza ukuze cyane bari barasize babishaka ngo azasigare ari icyigisho cy'uko umututsi yasaga baba ari we babanza mu musarani ngo kugira ngo bivure umwaku w'amaraso y'abagore n'abana b'Abatutsi kugira ngo atazabasama. Uwo niwe mugabo umwe rukumbi wiciye aho.

Birumvikana ko mu gihe babonye Interahamwe zambaye amakoma, bafite intwari gakondo bavuze amafirimbi, bagabweho igitero bagize ubwoba bwinshi, bamwe bagerageje gucika no kwirukanka ariko bakabirukankana bakabica abandi bakabagarura. Abandi bari bafite intege nke bahebeye urwaje bakomeza gusenga. Ubwo rero barishwe karahava, bakira urupfu, bariyakira ku buryo abenshi baratembwaga ariko ntibatake bagapfa nk'intama.



Abagize uruhare muri ubwo bwicanyi:

Safari Jean Bosco yari Inspecteur w'amashuri muri Komini Ntyazo akaba umuhungu w'umucuruzi ukomeye cyane witwaga Mubiligi Athanase ni we wari warazanye MDR muri ako gace nyuma aza guhinduka MDR Power. Uyu yajyaga gufata amasomo kwa Bandora ku Ruhuha y'uko bazakora Jenocide. Yarafunzwe aho afunguriwe yahise atorokera muri Malawi aho ari kumwe n'abo bavukana.

Kageza Jean Nepomuscene yari umucuruzi nawe ukomeye ari mu bantu bayoboraga ibitero.

Ruduri Félicien nawe yari umucuruzi ari mu bantu bagize uruhare rukomeye.

Hanyurwimfura Antoine ni mwishywa wa Sindikubwabo Theodore akaba yari umu planton wa kanto ya Nyamiyaga ari mu bantu bari mu bitero ndetse wanahurije igitero cyo ku Muyira

Mirenzo n'abahungu be bari impunzi z'abarundi bari bashyushye cyane mu bwicanyi ; Ndolikimpa Aphrodice yahoze ari Brigadier wa Komini Ntyazo; Ntabuye Sylvain yari umwalimu muri CERAI ariko aribwo akirangiza amashuri niwe wazaga guhitamo abakobwa asambanya nawe yari mu bajyaga gufata amasomo kwa Bandora ku Ruhuha; Nomani yari interahamwe y'i Bugesera yari yarahahungiyeye imirwano y'Inkotanyi, yari kumwe n'izindi nterahamwe bazanye; Gashushure Ernest ni umwalimu wari ufite indangururamajwi ari mu modoka abwira abantu ko hatanzwe ihumire; Rugwizangoga; Bazindyiki Antoine,...

Hari n'uwari umwana witwaga Montfort akaba umwuzukuru w'uwitwaga Rutare wasambanyije abana bangana aranabica, yarafunzwe, afungurwa mu bana kuko yari afite imyaka icumi (10).

Umusozo

Ubwicanyi bwibasiye Abatutsi bwarakomeje mu duce tumwe tw'Igihugu, bukorwa kimwe, ni ukuvuga ko uwitwaga Umututsi wese yishwe, abenshi bishwe bahunga. Kuri iyi tariki abenshi biciwe mu nyubako z'ubuyobozi, Komini, no mu nsengeru kuko abantu bibeshyaga ko bashobora kuharokokera.

Bikorewe i Kigali, 03/5/2020

Dr Bizimana Jean Damascene

Umunyamabanga Nshingwabikorwa

Komisiyo y'Igihugu yo Kurwanya Jenocide, CNLG

